

宋史新編

宋史新編卷七十一

列傳十三

明南京戶部主事莆田柯維騏著

曹翰

楊信

党進

李漢瓊

劉遇

李懷忠

宋信

田重進

劉廷翰

崔翰

曹翰大名人少爲郡小吏周祖以隸世宗帳下世宗鎮
澶淵署爲牙校入尹開封留翰在鎮會周祖寢疾翰不
俟召歸密謂世宗曰主上不豫王爲冢嗣不侍醫藥而
決事於外廷失天下望世宗悟卽入侍以府事屬翰世
宗卽位遷至樞密承旨知雄州世宗大漸諭范質等以

王著爲相翰爲宣徽使質以著嗜酒翰飾詐而專竝寢之改德州刺史宋初累功遷蔡州團練使開寶二年從征太原復爲行營都壕砦使河決澶州翰出銀器助役沉所乘白馬以祭復決陽武再護役皆有成績征江南改行營先鋒使江州拒命屠城無譙類所略金帛以億萬計僞言欲致廬山東林寺鐵羅漢像五百頭於京師因調巨艦百艘載所得以歸錄功遷桂州觀察使判潁州太平興國中從征太原又從征幽州卒掘土得蟹翰謂諸將曰蟹水物而陸居失所也且多足彼援將至況蟹者解也其班師乎已而果驗從幸大名拜威塞軍節

度仍判潁州復命爲幽州行營都部署詔督開南河以
通漕議築大隄捍之遣徒伐巨木於漢境得數萬以濟
用訖事歸鎮在郡歲久征斂苛酷以汝陰令孫崇望訴
下詔獄上貸其死削爵流登州後起至左千牛衛上將
軍卒年六十九贈太尉優遷其四子官六子皆補殿直
翰嘗作退將詩曰曾因國難披金甲恥爲家貧賣寶刀
直禁語及之上憫其意有銀錢之賜真宗賜諡武毅翰
卒未三十年子孫流丐海上蓋陰禍云

楊信瀛州人初名義顯德中隸太祖麾下爲裨校宋初
累遷靜江軍節度開寶二年散指揮都知杜延進等將

爲不軌謀泄夜啓玄武門召信逮捕遲明十九人皆獲
歷授義成軍節度太平興國中改鎮寧軍竝領殿前都
指揮使以疾在告卒信雖瘖疾而質實自將善部分士
卒指顧申儆動有紀律有童奴田王者書掌爲字直達
其意無失未死前一日瘖疾忽愈信弟嗣贊嗣以信薦
爲殿直累遷如京使嘗爲邊將知諸州軍咸有治狀後
再知保州又有戰功真宗歷拜保州團練使時楊延昭
方爲刺史嗣言嘗與延昭同官不可驟居其上乃命遷
延昭官嗣與延昭久居北邊俱以善戰聞時謂之二楊
改涿州團練都巡檢使兼保州鈐轄坐與延昭禦邊寇

失律代還特有其罪復以其練達邊事出歷諸州都部署以左龍武大將軍致仕卒年八十一贊稍知書無異能以兄故得掌禁旅累資朝著至牧守焉

党進馬邑人周時自軍伍累遷鐵騎都虞候宋初遷至彰信軍節度兼侍衛步軍都指揮使開寶中征太原將行營前軍及攻晉陽師未成列太原驍將楊業領突騎數百來犯進奮身從數人逐業業急入湟中會援兵至緣緇入城太祖激賞之改馬軍領鎮安軍節度太宗時出爲忠武軍節度在鎮歲餘一日自外歸有大蛇臥榻上寢衣中進怒烹食之遇疾卒年五十一贈侍中進彤

貌魁岸居常恂恂每擐甲胄毛髮皆豎進名進自稱曰
暉人問之則曰吾欲從吾便耳嘗受詔巡京師有畜養
禽獸者必取而縱之罵曰買肉不供父母反飼禽獸乎
太宗嘗令親吏臂鷹雛于市進亟欲放之吏曰晉王鷹
也乃戒之曰汝謹養視人傳爲笑少給事魏帥杜重威
子孫有貧困者進分俸給之士大夫或有愧焉

李漢瓊洛陽人晉由衛士爲內殿直周歷左射指揮使
宋初累遷侍衛馬軍都虞候領洮州觀察使征江南以
功領振武軍節度太平興國中出爲彰德軍節度親征
太原改攻城都部署漢瓊先登矢集其腦併指猶力疾

戰太原平改鎮州兵馬鈐轄契丹數萬騎寇中山漢瓊大敗之俘斬萬計加檢校太尉車駕幸大名上謁陳邊事稱旨命爲滄州都部署以病還京卒年五十五贈中書令漢瓊木強使酒難近然善戰有功無子

劉遇清池人初隸周祖帳下後授控鶴副指揮使事太祖太宗累立戰功積遷至彰信軍節度坐攻范陽失律左授逾年復保靜軍節度幽州行營都部署護築保州威虜靜戎平塞長城五城徙鎮滑州卒年六十六贈侍中遇性淳謹待士有禮尤善射太宗待之厚焉

李懷忠范陽人太祖掌禁兵隸帳下累遷日騎左右廂

都指揮使初太祖征晉陽累月未下懷忠力阻班師會
盛暑戰不利懷忠中流矢戰益奮太祖幸西京愛其形
勢得天下中正將卜都諫曰東京有汴漕之利禁衛數
十萬仰給於此帑藏重兵皆在焉根本安固已久一旦
遷徙臣未見其利上嘉納之太宗卽位遷侍衛步軍都
虞候領大同軍節度改步軍都指揮使卒贈侍中

朱信本溪族少勇悍善射周隸護聖軍以功遷龍捷散
都頭太祖總禁兵隸麾下得給使左右遂委心焉署牙
校及卽位歷殿前指揮使領郴州刺史太宗累遷彰化
軍節度使雍熙三年征幽薊爲幽州西北道行營馬步

軍都部署敗契丹于新城契丹率衆復戰王師稍却信獨以麾下龍衛卒三百禦敵敵圍之數重矢下如雨會暮信持大刀率從騎大呼殺數十人遂以百餘騎突圍得免坐失律責授右屯衛大將軍明年復授彰武軍節度端拱中改鎮橫海軍信不知書所爲多暴橫軍人宴犒甚薄乃召爲右武衛上將軍旣而判左右金吾街仗事強市人物妻死買地營葬妄發居民冢墓下御史鞠之獄未上卒年六十七贈橫海軍節度

田重進幽州人初爲卒隸太祖麾下及受禪積功至灤州刺史太宗錄太原功擢天德軍節度使改靜難軍河

決滑州總護其役卒塞之雍熙中北征重進率兵溥飛狐城下擒契丹驍將大鵬翼及其監軍馬贊副將何萬通進攻蔚州其牙校李存璋等殺酋帥率吏民來附會曹彬之師不利乃遷定州駐泊兵馬都部署明年率師攻下岐溝關後歷求興軍節度卒年六十九贈侍中重進不事學太宗居藩邸時愛其忠勇嘗遺以酒炙不受曰爲我謝晉王我知有天子爾

劉廷翰浚儀人父紹隱後唐末隸兵籍晉天福中范延光反力戰死焉周世宗鎮澶淵廷翰隸帳下卽位累功遷散指揮第一直都知宋初預平上黨維揚遷鐵騎都

指揮使領廉州刺史太宗時累功遷大名尹天雄軍節度卒年七十贈侍中廷翰以武勇自任雖不事威嚴而長於御下爲殿前都指揮使入朝常行衆中每歷宮殿門少識之者郊祀恩當追封廷翰少孤其大父以上皆不逮事忘其家諱上爲撰名親書賜之

崔翰字仲文京兆人風姿偉秀太祖見而奇之隸麾下以功補軍使卽位遷御馬直副指揮使又領端州刺史太宗卽位進本州團練使從征太原率先攻城流矢中其頰神色不變督戰益急及平上將有事幽薊諸將不敢言翰獨奏曰所當乘者勢也不可失者時也取之易

上遂定議北伐旣而班師命知定州得以便宜從事契丹寇蒲城翰會兵合擊之俘馘數萬擢武泰軍節度使初劉繼元降上令翰往撫慰俘略無得出城時秦王廷美以數十騎將冒禁出翰呵止之至是構於上明年出爲感德軍節度使後知滑州歷定國鎮安二鎮卒年六十三贈侍中翰驍勇有謀所至多立功輕財好施死之日家無餘貲

論曰太祖太宗時詔將蓋又有曹翰等十人云觀其負勇略累立戰功均爲干城之材然操行臧否亦頗可言曹翰贖貨忍心屠江州無噍類而報及子孫米信恣欲

橫行擅掘居民冢墓竟繫詔獄以死蓋皆道家之所忌也崔翰好施甘貧二子視之有媿色然率爾伐燕之對挫國威而啓虜釁誰執其咎耶李漢瓊季懷忠劉廷翰殊無他長楊信之篤實劉遇之淳謹田重進之忠朴庶幾君子之致焉黨進卽非其倫然篤於故舊不存沒易心亦可尚哉

李瓊

陳思讓

焦繼勳

陳承昭

郭瓊李萬超白重贊王仁鎬袁彥張鐸等附

李瓊字子玉幽州人杖策依唐莊宗屬募勇士卽應募與周祖等十人約爲兄弟祝曰凡我十人龍蛇混合異

日富貴無相忘皆刺臂出血爲誓周祖嘗過瓊覓其危
坐讀書因問何書瓊曰此閩外春秋所謂以正守國以
奇用兵較存亡治亂記賢愚成敗皆在此也周祖曰兄
當教我自是周祖出入常袖以自隨及討河中乃解瓊
兵籍令參西征軍事賊平表於朝遷至濟州刺史世宗
遷安州防禦使治郡寬簡民請立碑頌德宋初召爲太
子賓客數年上章請老改右驍衛上將軍致仕卒年七
十三贈太子少師

陳思讓字後已盧龍人父審確金州防禦使思讓初隸
唐莊宗帳下卽位補右班殿直晉天福中再遷作坊使

以討安從政功授坊州刺史改磁州衛州時武臣罕有
執喪禮者思讓連丁內外艱不俟詔奔訃聞者嘉之起
復隨州刺史漢初移淄州周祖陞磁州爲團練以思讓
充使廣順元年連敗劉崇兵命權知絳州明年就遷防
禦使顯德中累爲邊將兩敗并軍遷至義成軍節度觀
察留後恭帝嗣位授廣海軍節度宋初加檢校太傅又
爲保信軍節度時皇子德昭納思讓女爲夫人開寶二
年改護國軍節度河中尹卒年七十二贈侍中思讓累
歷方鎮無敗政然酷信釋氏所至多禁屠宰奉祿悉以
飯僧人目爲陳佛子身沒家無餘財子欽祚至長州刺

史欽祚子若拙

若拙字敏之進士甲科歷鹽鐵判官遷至工部郎中與
三司使陳恕不協求徙他局改主判開折司真宗北巡
命李沆留守東京以若拙爲判官河決鄆州命與閻承
翰往規度尋命權京東轉運使因發卒塞之又於齊州
浚導水勢設巨隄於采金山奏免六州所科稍木五百
萬民甚便之河平直授轉運使召還拜刑部郎中知潭
州時三司使缺若拙自謂得之及是大失望因請對言
親老不願遠適求納制命真宗怒謂宰相曰士子操脩
必須名實相副頗聞若拙有能幹委以藩任而貪進擇

祿如此凡用人豈以親疎爲間苟能盡瘁奉公有所樹立何患名位之不至也乃追所授告敕黜知處州徙溫州代還再爲鹽鐵判官出爲河東轉運使助汾陰經費凡十萬擢右諫議大夫知永興軍府鄰郡歲饑前政拒其市糴若拙許貿易民賴以濟又移鳳翔入拜給事中知澶州蝗旱之餘勤于政治郡民列狀乞留卒若拙多誕妄寡學術當時以第二人及第者爲勝眼若拙素無文故目爲瞎勝云

焦繼勳字成績許州人少游俠以飲博爲務晉祖鎮太原繼勳以儒服謁見晉祖與語悅之留帳下累功拜齊

州防禦使少帝立歷遷保義軍兵馬留後漢初以功授
保大軍節度召入會漢祖幸大名留爲京城右廂巡檢
使俄改右羽林統軍隱帝末命領兵北征及周祖舉兵
向闕繼勳奉隱帝逆戰留子陂戰不利遂歸周祖歷拜
彰武軍節度宋初召爲右金吾衛上將軍歷彰德軍節
度卒年七十八贈太尉繼勳獵沙陟傳頗達治道所至
有善政然性吝嗇多省公府用度云子守節

守節字秉直初補左班殿直擢閤門祇候咸平中置江
淮南荆湖路兵馬都監首被選擢又討施夔州叛蠻以
大義諭其酋長皆悔過內附還遷閤門通事舍人監香

藥相易院三言言處謂地八十餘里守節已爲不庫
副使當遷閣門副使真宗謂輔臣曰守節緣財利羨餘
而遷橫行何以勸邊陲効命者止以爲宮苑副使奉使
契丹館伴丁求說指遠山謂曰此黃龍府也守節應聲
曰燕然山距此幾許求說慙服久之歷知襄鄧汝三州
遷四方館使以右神武大將軍致仕

陳承昭江表人始事李景爲保義軍節度周世宗拔泗
州引兵東下命太祖爲先鋒遇承昭於淮上擊敗之禽
承昭以獻世宗釋之授右監門衛上將軍賜袍帶改右
領軍衛上將軍分司西京宋初入朝太祖以其習知水

利督治惠民五丈二河以通漕運都人利之歷遷右龍武軍統軍卒年七十四贈太子太師

郭瓊盧龍人少以勇力聞事契丹爲藩漢都指揮使後唐挈其族來歸明宗以爲亳州團練使歷刺階州晉歷沂州改懷州契丹陷中原盜賊蠭起復改沂州以禦盜瓊卽日單騎赴郡盜聞瓊威名相率遁去漢乾祐中淮人攻密州以爲行營都部署未至淮人解去改潁州團練使又加防禦使周歷絳蔡齊三州防禦使在齊州民饑瓊以已俸賑之州人詣闕頌德政詔許立碑宋建隆三年告老加右領軍衛上將軍致仕

李萬超太原人晉祖起并門應募隸軍籍稍遷軍校從
李守貞討楊光遠奮勇先登飛石中其腦氣不屬者久
之開運中從杜重威拒契丹於陽城流矢貫手拔矢復
戰神色自若以功遷肅銳指揮使契丹入中原時萬超
以本部屯潞州主帥張從恩棄城歸契丹萬超率所部
大譟入府署殺契丹使推前驍衛將軍王守恩爲帥列
狀以聞漢祖從其請史弘肇表爲先鋒馬步軍都指揮
使路經澤州刺史翟令奇堅壁拒命萬超諭降之遂以
爲刺史及征李守貞爲行營壕砦使河中平拜懷州刺
史周祖開國從征慕容彥超以功授洛州團練使預收

秦鳳改萊州從平淮南連移斬登二州所至有善政宋
初遷至左驍衛大將軍

白重贊憲州人少從軍有武勇歷事漢周積功遷至義
成軍節度從征劉崇重贊與李重進居陣西偏樊愛能
何徽居東偏旣合戰愛能徽皆遁走惟重贊重進率所
部力戰世宗自督親軍合勢薄之并人大敗旣誅愛能
等重贊以功授保大軍節度使改河陽三城節度檢校
太尉遷彰義軍節度宋初加檢校太師歷定國軍節度
後改左千牛衛上將軍奉朝請

王仁鎬龍岡人後唐明宗鎮邢臺署爲牙校歷事晉漢

遷至昭義天雄二軍節度副使周祖鎮鄴表爲副留守
起兵實預其謀及卽位累遷未興軍節度使世宗立移
河中五年拜安國軍節度乃仁鎬故鄉也視事翌日省
父祖之墓周視松楸泣謂所親曰仲由以爲不如負米
之樂信矣恭帝立移山南東道節度宋初加檢校太師
以疾召還卒仁鎬性端謹儉約崇信釋氏祿賜多奉佛
飯僧每晨誦佛經五卷或至日盥云

袁彥河東人少以趨勇應募周祖鎮鄴爲部直小將累
功遷至保義軍節度宋初加檢校太尉改鎮曹州又爲
靜難軍節度後移鄆州數年罷鎮歸闕卒

張鐸河朔人少以材武應募隸軍籍漢初領澧州刺史周祖鎮鄴鐸以所部從行及起兵鐸預焉積遷至檢校太尉河中尹護國軍節度宋初加檢校太師俄復鎮涇州州官歲市馬鐸增其直私取之累至十六萬貫及擅借公帑錢侵用官廩事發召歸太祖以宿舊釋不問第罷爲左屯衛上將軍奉朝請仍蠲除所盜川又嘗假晉邸錢百六十萬太宗卽位亦詔貰之俄命判左金吾街仗及駕征河東爲京城內外都巡檢卒子熙載至左千牛衛大將軍熙載子禹珪字天錫粗知書有方略幼事太宗藩邸卽位擢至殿前散祗候都虞候真宗歷擢高

陽關行營副都部署帝思守臣有武幹能鎮靜邊郡者
親錄十餘人名付中書禹珪預焉歷知澶州頗勤政治
連詔嘉獎拜洺州團練使尋知廣信軍天禧初復爲高
陽關副都部署兼知瀛州卒

劉重進幽州人梁末隸軍籍晉初以習契丹語應募使
北邊遷西頭供奉官再使契丹契丹主以其敏慧留帳
前通事俄南侵署忠武軍節度漢初移鎮鄧州乾祐末
罷鎮來朝周祖起兵至封丘詔重進與左神武統軍袁
義率兵拒之重進望塵退走周廣順初從征兗州未幾
封薛國公歷武勝軍節度改鎮邠州恭帝卽位封開府

宋初進封燕國公後歷左領軍衛上將軍重進善譯語
值契丹入中原遂至方鎮及在環衛嘗從幸玉津園太
祖召與語旣退謂左右曰觀重進應對不逮常人前朝
以爲將帥何足重耶

祁廷訓本名廷義避太宗舊名改焉洛陽人善書計騎
射初隸周祖帳下累遷嵐州防禦使領龍捷右廂都指
揮使宋初遷至義武軍節度太平興國中改左領軍衛
上將軍卒廷訓形質魁岸無才略臨事多規避時人目
爲祁橐駝以其龐大而無所取也

李萬全吐谷渾部人善左右射隸護聖軍爲騎士遷至

左軍都校與田景咸王暉等從周祖入汴號十軍主顯
德中爲彰武軍節度宋初加檢校太尉橫海軍節度乾
德中代歸數召預苑中宴射萬全無將略惟善挽强老
而不衰帝以此賞之

田景咸王暉皆太原人景咸仕漢周歷武勝軍節度宋
終左驍衛上將軍景咸務聚斂罷鎮常忽忽不樂妻識
其意引景咸徧閱囊儲方自釋邢州日使者王班至景
咸勸班酒曰王班請滿飲典客曰是使者姓名也景咸
悟曰我意王班是官爾何不早諭我聞者笑之暉貴甚
富縱部曲誅求民甚苦之周世宗以先朝功臣知而弗

問至右神武統軍宋終右領軍衛上將軍

論曰節鎮李瓊以下十五人皆周庭宿將與宋祖疇昔
聯事位序相侔也劉重進祈廷訓固庸流其餘各負勲
勞豈易折服宋受周禪於反掌間諸人者舊爲僚儕俄
爲臣僕俛首聽命罔或差池豈非天與人歸之會歟太
祖於引年者優之禮罷鎮者恩眷不衰慮遠而德弘哉

宋史新編卷七十二

列傳十四

明南京戶部主事莆田柯維祺著

李穀

竇貞固

皆居閩李濤王易簡前上友張錫張鑄邊歸譔劉清顏布附

劉溫叟

子煒孫几

邊光範

劉載

程羽

李穀字惟珍汝陰人身長八尺少任俠頗爲鄉人所困發憤從學第進士晉少帝尹開封唐晉穀俱爲推官及卽位拜職方郎中歷磁州刺史北平水陸轉運使契丹入汴少帝蒙塵舊臣無敢候謁者穀拜迎於路相對泣下因傾囊以獻會契丹主發使至州穀禽斬之契丹攻

安陽穀遂見獲穀詞不屈卒寬焉德光道殂永康繼立
署穀給事中歷漢周至中書侍郎平章事周祖在乾祐
中已有人望屬漢政紊亂潛貯異志屢諷穀穀但對以
人臣當盡節奉上而已故開國之初倚以爲相穀世居
洛陽穀旣貴訪得舊地建蘭若又立垣屋凡族之不可
仕者分田居之詔改清風鄉高陽里爲賢相鄉勳德里
顯德初進司空門下侍郎監脩國史穀以史氏所述本
於起居注喪亂以來遂廢其職請令端明樞密直學士
編記言動爲內廷日曆以付史官二年冬議伐南唐爲
行營前軍都部署兼知廬壽等州行府事領兵渡淮進

國壽春南唐遣將來援穀退守浮梁以待戎輅之至仍焚芻糧回軍之際遞相掠奪淮北役夫數百悉陷于壽春世宗聞之怒亟命李重進將兵以穀判壽州行府旋詔歸闕得風痺疾每軍國大事令中使就第問之四年春吳人援壽春不及者數里師老無功時請罷兵爲便世宗令范質王溥就穀謀穀手疏請親征有必勝之利三世宗大悅用其策及淮南平賞賜甚厚以久疾辭位世宗不允錄功加爵邑復抗表乞骸骨罷守司空加邑封恭帝卽位加開府儀同三司進封趙國公求歸洛太祖卽位遣使就賜器幣卒年五十八贈侍中穀深沉有

城府善論事言多詣理人主爲之聳聽人有難必救有恩必報好汲引寒士多至顯位與韓熙載善熙載將南渡密告穀曰若江東相我我當長驅以定中原穀笑曰若中原相我下江南探囊中物耳穀果如其言李昉嘗爲穀記室穀曰予他日官祿當如我昉後至宰相司空顯德中扈載有文章名王朴薦令知制誥穀曰斯人薄命慮不克享耳朴曰公在衡石之地當以材進人何得言命載未幾卒世謂朴能薦士穀能知人穀歸洛受李筠遺錢五十萬他物稱是筠敗穀憂恚而終

竇貞固字體仁同州人父專後唐左諫議大夫貞固

光中第進士晉祖卽位連拜中書舍人天福三年疏曰
陛下方樹丕基宜求多士乞降詔百僚令各司議定一
人有何能識堪何職官若果當才望加獎賞或涉徇私
宜加殿罰三人同行尚聞擇善十目所視必不濫知書
奏命所司著爲令典歷刑部門下二侍郎少帝卽位歷
刑部尚書漢祖入汴貞固等率百官迎謁漢祖駐駕勞
問久之初營宗廟以姓自漢出遂襲國號尊光武爲始
祖并親廟爲五詔羣臣議貞固上言周之制七廟者太
祖及文王武王之祧與親廟四也今請尊高皇帝光武
皇帝爲始祖法文王武王不遷之制從之論者以天子

建國各從其所起堯自唐侯禹生大夏是也立廟皆祖
其有功商之契周之后稷魏之武帝晉之三廟是也高
祖起於晉陽而追嗣兩漢甚非其義貞固又以四親匹
庶上合高光失之彌遠矣俄遷吏部尚書時蘇逢吉蘇
禹珪自霸府僚佐驟居相位思得舊臣冠首以貞固有
時望乃拜司空門下侍郎平章事弘文館大學士隱帝
卽位加司徒改本貫永安鄉爲賢相鄉班瑞里爲勳貴
里周祖兵起貞固與蘇逢吉奉隱帝兵次于野敗逢吉
蒼黃自殺貞固遂詣周祖及登位加兼侍中會以馮道
爲首相改監脩國史俄罷守司徒封沂國公世宗卽位

以范質爲司徒貞固遂歸洛陽輸課役齒爲編民貞固不能堪開寶二年病困自爲墓誌卒年七十八

智居潤高唐人善書計爲小吏晉景延廣留守西洛署爲右職周世宗尹京詔補府中要職卽位擢至左領軍衛上將軍恭帝加檢校太傅太祖立加檢校太尉征澤潞命赴澶州巡警師還權知鎮州加左領軍衛上將軍又權知澶州拜義武軍節度卒贈太師居潤篤於行義晉室將亡景延廣委其族自洛赴難至則爲德光所執虜騎在洛者遽欲恣標掠延廣僚吏部曲悉遁獨居潤力保護其家居潤與太祖同事世宗情好款浹嘗薦沈

倫純謹可用後至宰相世稱其知人

李濤字信臣京兆人嘗爲河陽令後唐天成初舉進士
甲科爲起居舍人晉初歷刑部郎中涇帥張彥澤殺記
室張式奪其妻其家上訴晉祖以軍功釋其罪濤伏閣
抗疏晉祖召見諭之濤植笏叩階聲色俱厲諫不已晉
祖不得已召式父子及其弟皆拜以官罷彥澤節制濤
因事停官後起遷屯田職方郎中中書舍人漢祖入洛
濤自汴奉百官表迎謁及至汴以濤爲翰林學士未幾
拜中書侍郎兼戶部尚書平章事隱帝卽位楊邠周祖
共掌機密史弘肇握兵柄與武德使李穀等中外爭權

互作威福濤疏請出邠等藩鎮以清朝政隱帝不能決
反爲所構免歸及周祖舉兵太后蒼皇涕泣曰不用李
濤之言宜其亡也周初起爲太子賓客歷刑部戶部二
尚書恭帝卽位封莒國公宋初拜兵部尚書卒贈右僕
射濤慷慨有大志工詩札性滑稽善諧謔亦未嘗忤物
居家以孝友聞弟澣字日新幼聰敏慕主楊盧駱爲文
章後唐時秦王從榮召至幕中從榮敗勒歸久之起爲
校書郎集賢校理仕晉至中書舍人再爲學士時濤在
西掖縉紳榮之契丹入汴澣因陷塞北周廣順中澣密
表言契丹表微之勢周祖嘉焉遣諜者齎詔慰撫仍命

澣通信澣復表述契丹主幼弱多寵好擊鞠大臣離貳
若出師討伐因與通好乃其時也屬中原多事不能用
其言契丹應曆十二年卒時建隆三年也濤收澣文章
編之爲丁年集澣孫仲容字儀父舉進士甲科仁宗朝
歷官知制誥累擢翰林侍讀學士兼龍圖閣學士至戶
部侍郎卒性醇易與人言未嘗及勢利三弟早卒字諸
孤如已子然於吏事非所長自集制草爲冠鳳集十二
卷

王易簡字國寶萬年人父以上三世俱刺史易簡梁乾
化中登進士第復隱華山召爲著作郎數月棄去復召

爲右拾遺上書忤旨出爲鄧州節度推官後唐同光中
辟爲魏王都督府記室參軍明宗卽位周帥羅周恭辟
爲掌書記府罷退居華陰作小隱詩以見志召遷至水
部郎中知制誥拜中書舍人晉初賜金紫判弘文館史
館事晉祖爲治務求速效易簡上漸治論歷吏部侍郎
左丞判吏部銓周朝諱簡易止名易遷禮部尚書改刑
部以太子少保致仕宋初召加少傅所居華陰構一鳴
堂三品樓優游自適無疾俄卒年七十九易簡少好學
攻詩性介特寡合子景讓進士及第至尚書郎

趙上苑花陽人本名遠避煬祖諱以字稱父簡章涿州

司馬上交美風儀善談論負才任氣爲鄉里所推後唐
時爲轉運判官遷殿中丞秦王從榮開府兼判軍衛上
交初充六軍諸衛推官後充判官遷至司封郎中從榮
不遵禮法好昵羣小上交從容言曰王忍爲此獨不見
恭世子戾太子之事乎從榮怒出之從榮及禍僚屬皆
坐斥上交由是知名晉歷御史中丞契丹入汴立明宗
幼子從益以上交爲右丞相漢祖將至從益遣上交馳
表獻款授檢校禮部尚書太僕卿遷祕書監周廣順初
拜禮部侍郎會將試貢士上交申明條制糊名考校擢
扈載甲科及取梁周翰諸人時稱得士轉戶部侍郎明

年再知舉謗議紛然時樞密使王峻用事常薦童子上
交拒之峻怒奏上交選士失實貶商州司馬會峻貶乃
止但坐所取士李觀侯瓌賦落韻改太子詹事顯德中
遷至吏部侍郎多請告游別墅世宗問陶穀曰上交豈
衰老乎穀對曰上交昔掌貢舉放鬻市家子李觀及第
受所獻名園多植花卉優游自適世宗怒免其官宋初
起爲尚書右丞卒上交好吟詠有集二十卷子曦字可
畏十二能屬文以蔭至著作郎早卒有集十卷

張錫閩縣人梁末劉君鐸任棣州刺史辟爲軍事判官
嗣光末爲緇川令不畏強禦專務愛民召爲監察御史

出爲陝虢觀察判官晉末拜右補闕歷開封府判官浚儀令遷至駕部郎中竝以清節聞周顯德中請老授右諫議大夫致政宋初改給事中卒

張鑄字司化洛陽人曾祖居卿祖楊父文蔚在唐俱舉進士楊至節度吏部尚書文蔚中書侍郎平章事鑄梁貞明三年舉進士歷仕五代遷至左諫議大夫給事中改祕書監判光祿寺宋初加檢校刑部尚書卒年七十二鑄美姿儀善筆札老能燈下細書如蠅頭由晉以來凡朝廷大禮冊文皆詔鑄書之性清介不事生產及卒身無兼衣家人鬻其服馬園圃以葬

邊歸讜字安正幽州薊人父退思檀州刺史歸讜弱冠以儒學名歷仕五代遷至尚書左丞樞密直學士世宗以累朝憲綱不振命爲御史中丞歸讜雖號廉直而性剛介言多忤物顯德三年冬大宴廣德殿歸讜酒酣揚袂言曰至於一柸而已世宗命黃門扶出歸讜回顧曰陛下何不決殺趙守微守微者囚獻策擢拾遺有妻復娶又言涉指斥杖配流故語及之翌日伏閣請罪詔於閣門復飲數爵以愧其心五年秋廣德殿門外忽厲聲聞於帝詔奪俸宋初遷刑部尚書甫三年告老拜戶部尚書致仕卒子定雍熙二年進士及第

劉濤字德潤彭城人後唐天成中舉進士釋褐爲鳳翔掌書記至起居舍人歷仕晉漢周至右諫議大夫顯德中再知貢舉樞密使王朴嘗有所薦不納朴銜之飛章言濤取士不精世宗命翰林學士李昉覆試出者七人濤坐責授太子右贊善大夫恭帝遷右詹事濤性剛毅不撓素與宰相范質不協常鬱鬱不得志退居杜門以書史自娛太祖知濤履行召赴闕以老病求退授祕書監致仕卒

顏衍字祖德曲阜人自言充國公四十五世孫梁龍德中擢第歷仕唐晉爲河陽三城節度副使檢校左庶子

知州事居半歲得家問父在青州有風痺疾行不奏棄官去不復有仕宦意父疾不能起行親自掬矢未嘗少倦晉祖聞之召爲工部郎中樞密直學士踰年上表請侍養授青州行營司馬父沒哀毀甚俄召爲駕部郎中鹽鐵判官以母老懇辭有詔止守本官未幾復出爲天平軍節度副使開運末召拜御史中丞頗有風采復抗表求侍養改戶部侍郎行又堅乞罷免詔書褒許卽與其母東歸漢乾祐末母喪服除詔津遣赴闕行辭以足疾不至周廣順初起爲尚書右丞俄充端明殿學士太祖征兗州以行權知州事歸朝權知開封時王峻持權

行爲峻所引用會峻收行罷職守兵部侍郎顯德初上表求解官授工部尚書致仕還鄉里宋初卒行守章句無文藻然諒直孝悌爲時所推

劉溫叟字永齡洛陽人父岳後唐太常卿溫叟七歲能屬文善楷隸以蔭歷右補闕晉少帝立拜翰林學士初岳嘗居內署溫叟復繼是任時人榮之契丹入汴溫叟懼北遷與承旨張允共上表求解職契丹主怒遂罷職出院漢祖南下溫叟自洛從至鄭州稱疾不行及入汴溫叟父之方至授駕部郎中周歷工部侍郎兼判國子祭酒事宋初改刑部未幾拜御史中丞後又兼判吏部

銓任臺丞十二年屬求代太祖難其人不允開寶四年
被疾太祖知其貧就賜器幣數月卒年六十三溫叟性
重厚方正事繼母以孝聞雖盛暑非冠帶不敢見五代
以來言執禮者惟溫叟焉立朝有德望精賞鑒門生中
尤器楊徽之趙鄰幾後皆爲名士史館修撰范杲幼時
以文贄大加稱獎以女妻之太宗在晉邸聞其清介遣
吏遺錢五百千納貯廳西舍中令吏封署而去明年重
午又送角黍執扇所遣卽送錢者視西舍封識宛然還
白之太宗曰我錢尚不用况他人乎昔日納之是不欲
拒我也周歲不啓封其苦節愈見命吏輦歸邸雍熙初

子炤罷徐州觀察推官待選以貧詣登聞求注官及引對太宗問誰氏子炤以溫叟對太宗愀然召宰相語其事且曰其父有清操錄子登朝庶足示勸擢太子右贊善大夫歷司封郎中炳燁並進士及第

燁字耀卿仕州縣積官祕書省著作佐郎天禧元年真宗謂宰相曰諫官御史當識朝廷大體於是以燁爲右正言會歲饑河決大興力役饑殍相望燁請策免宰相以應天變時詔都城建祥源觀燁言其詭妄不經且亢旱不可興土木以營不急皆不報表請補外帝以燁屢言事乃以判三司戶部勾院出安撫京西累遷龍圖閣

直學士知河南府徙河中府卒初王曙坐寇準貶在朝
無敢往見者燁歎曰友朋之義獨不行於今歟往餞經
宿而還雅善處士李瀆死爲陳其高行得贈典唐末五
代亂衣冠舊族多離去鄉里或爵命中絕而世系無所
考惟劉氏自十二代祖北齊中書侍郎環雋以下仕者
相繼世牒具存焉子几

几字伯壽以燁任爲將作監主簿生而豪雋長折節讀
書第進士辟通判邠州邠地鹵民病遠汲几浚渠引水
注城中役興客曰自郭汾陽城此州苟外水可醴何待
今日几不答未幾水果至孫沔薦其才堪將帥換如京

使知寧州加本路兵馬鈐轄知邠州進皇城使知涇州
辭以母老丐復文階歸養仁宗諭之曰涇內地也將母
莫便焉命特賜冠帔領循州刺史遷西上閣門使再歸
郎中班復以薦爲嘉州團練使爲太原涇原路總管改
鄜州召判三班院英宗以爲秦鳳總管神宗卽位轉四
方館使知保州治狀爲河北第一踰六年卽請老還爲
祕書監致仕元豐三年詔詣太常定雅樂語在樂志凡
得謝二十年放曠尚少間遇唐末異人靖長官者得養
生訣故益老不衰問與人語邊事謂張耒曰此見詔書
禁邊吏夜飲夫惟牛醢酒豐犒而休養之非欲以醉飽

爲德所以增士氣也再加通議大夫卒年八十一凡篤
於風義推父遺恩官從兄已得任子必先兄弟子之孤
者其議樂律以爲古今異時聲亦隨變猶古之冠服不
可加於今人也儒者泥古致詳於形名度數問而不知
清濁輕重之用故求於器雖合考於聲則不諧嘗游佛
寺聞鍾聲曰聲漸而悲主者且不利是夕主僧死在保
州聞角聲曰宮微而商離至秋守臣憂之及期凡遇疾
然所學頗雜鄭衛云

邊光範字子儀并州人父仁嗣忠武軍節度副使光範
後唐天成中起家掾次令召爲殿中丞賜緋後改太常

丞晉歷樞密直學士少帝以藩邸舊僚待遇尤厚因遊宴見光範位翰林學士下卽日拜尚書禮部侍郎知制誥充翰林學士仍直樞密院漢初改檢校刑部尚書衛尉卿周初累遷禮部侍郎將及秋試言於執政曰單門偶進何言名第處文衡校閱名賢品藻優劣非下走所能執政曰公晉末爲翰林勿避事也及期辭疾不出乃以翰林學士承旨徐台符掌之時論多其自知世宗卽位改戶部侍郎宋初征澤潞命爲前軍轉運計度芻糧拜太常卿時張昭爲吏部尚書朝議以其耆老令光範簽判選事建隆四年襄州節度慕容延釗征湖南以光

範權知州事路當衝會餉饋無闕坐失舉左遷太子賓客仍知襄州五年兼橋道使以州卒代民官給器用役不淹久人以無擾詔書褒美開寶中復判吏部銓曹判御史臺事真拜中丞卒光範謙退和易雅有吏幹母病疽光範嘗吮之人稱其至孝云

劉載字德興范陽人後唐舉進士晉初解褐校書郎遷左拾遺集賢殿直學士歷漢周遷至給事中宋初護浚五丈河掌建安榷貨務又知鎮州開寶中改山南東道行軍司馬十年不召太平興國初復入爲給事中三年出知襄州六年代還告老改工部侍郎致仕卒載尤好

學博通史傳嘗作弔戰國賦萬餘言又著五論曰爲君
爲相爲將去讒納諫頗爲文士所稱子宗望景德二年
進士及第

程羽字冲遠深州人少好學能屬文在晉登進士第歷
數縣令皆有政績開寶中歷官領開封府判官羽淳厚
謹恪太宗尹京待以長者及卽位拜給事中出知成都
府爲政寬簡蜀人便之入朝拜禮部侍郎上欲優以清
職卽殿名以爲文明殿學士且營第賜之數年拜兵部
侍郎致仕卒年七十二贈禮部尚書從孫琳別傳
論曰自唐之亡也干戈興而教化弛五十年間凡五易

姓士大夫齷齪者惟自幸於不喪而負聲譽者竟甘心
撓節以就功名蓋俗之漸靡久矣馮道自號長樂老且
述平生履行勳爵以爲榮爲快王溥亦誇詡富貴賦自
問詩庸知李穀輩不盡如二子之爲心耶若劉溫叟邊
光範劉載程羽仕宋之日居多竝爲時論所寔又何旣
往之計哉

張昭

竇儀

弟儀稱

呂餘慶

劉熙古

王季正
家史

石熙載

子中立

李穆

弟肅

張昭字潛夫本名昭遠避漢祖諱改焉濮州人祖楚平
壽張令赴調長安值巢寇亂不知所終父直尚幼避地

河朔旣長自秦抵蜀徒行勾食求之十許年不能得乃
發衣成服竟隱居授徒號逍遙先生昭未冠徧讀九經
通其義處儕類中緩步闊視以爲馬鄭不已若也後至
贊皇遇程生者專史學以爲專究經旨不通今古率多
拘滯繁而寡要若極談王霸經緯治亂非史不可因出
班范漢書十餘義罔權授昭荀紀國志等後又盡得十
三史五十七年間能馳騁上下數千百年事又注十代輿
亡論處亂世躬耕負米以養親後唐莊宗入魏游士多
自効軍門昭因至魏攜文數十軸謁興唐尹張憲恨相
見之晚卽署府推官同光初奏授真秩加監察御史重

行憲爲北京留守昭亦從至晉陽莊宗及難聞鄴中兵士推戴明宗憲部將符彥超合戍將應之昭謂憲曰得無奉表勸進爲自安計乎憲曰我本書生見知主上位至保釐乃布衣之極苟覩顏求生何面目見主於地下昭曰此古人之志也公能行之死且不朽矣相泣而去憲遂死之時論重昭能成憲之節事寧以昭爲北京留守推官加殿中侍御史內供奉官賜緋天成三年改安義軍節度掌書記以昭有史材拜左補闕史館修撰遷都官員外郎時皇子競尚奢侈昭疏諫謂不豫爲教道何以置之盤牙又謂古之人君卽位必封太子拜諸王

使禮秩有常邪慝不作昔隋祖聰明煬帝亦傾楊勇太宗齊聖魏王終覆承乾願於聖代杜此厲階明宗不能用四年上武王以來功臣列傳三十卷以本官知制誥明宗好畋獵昭䟽諫以爲事有可畏者四望陛下念老氏馳騁之戒樹文王忠厚之基約三驅之舊章定四時之遊幸明宗嘉納之後以職方員外郎知制誥充史館修撰上言乞復置觀察使察民疾苦御史彈事諫官月給諫紙竝從之明宗方務聽納昭復上䟽曰保邦之道有八審焉委任審於器聽受審於忠邪出令審於煩苛其師審於德力賞罰審於喜怒毀譽審於愛憎議論

審於賢愚嬖寵審於姦佞明宗稱善歷遷禮部侍郎御
史中丞晉天福二年改戶部侍郎宰相桑維翰薦爲翰
林學士以唐史未成詔與呂琦崔悅等續成之別置史
館命昭兼判院事昭又撰唐朝君臣正論二十五卷上
之歷拜尚書右丞漢加檢校禮部尚書周初遷至兵部
尚書世宗好拔英俊有自布衣及下位上書言事者多
不次進用昭疏諫曰昔唐初劉洎馬周起於徒步太宗
擢用爲相其後柳璨朱朴方居下僚昭宗亦加大用然
太宗用之而國興昭宗用之而國亡士之難知如此臣
願陛下以四士爲鑒戒恭帝卽位封舒國公宋初拜吏

部尚書乾德元年郊祀昭爲鹵簿使奏復宮闕廟門郊壇夜警晨嚴之制禮畢進封鄭國公致仕改封陳國公卒年七十九昭博學好纂述藏書數萬卷兼善天文風角太一卜相兵法釋老之說自唐至宋專筆削典章之任劉鋹之擒也昭已致政太祖遣近臣就問獻俘禮所著有嘉善集名臣事迹子秉圖進士及第

竇儀字可象漁陽人曾祖遜王田令祖思恭媯州司馬父禹鈞與兄禹錫皆以詞學名禹鈞唐天祐末起家幽州掾至周爲太常少卿右諫議大夫儀晉天福中第進士歷仕漢周至兵部侍郎宋初遷工部尚書兼判大理

素奉詔重定刑統爲三十卷會翰林學士王著以酒失
貶太祖謂宰相曰深嚴之地當得宿儒處之范質等對
曰竇儀清介重厚然已自翰林遷端明矣太祖曰非斯
人不可處禁中卽日再入翰林爲學士乾德中加禮部
尚書卒年五十三贈右僕射儀學問優博風度峻整弟
儼侃僂僖相繼登科馮道嘗贈禹鈞詩曰靈椿一株老
丹桂五枝芳時號竇氏五龍周世宗欲相儀與陶穀以
問范質質曰穀有才無行儀執而不通事遂寢太祖屢
稱儀有執守欲相之趙普忌儀剛直乃薦薛居正及儀
卒太祖嘆曰天何奪我竇儀之速蓋惜其未大用云子

謹謁諸俱登進士第

儼字望之晉天福六年進士爲左拾遺漢爲史館修撰
周廣順初遷右補闕改主客員外郎知制誥時儀自閣
下入翰林兄弟同日拜命分居兩制時人榮之俄加金
部郎中拜中書舍人顯德元年加集賢殿學士判院事
世宗方切於治道儼上疏曰歷代致理六綱爲首一曰
明禮二曰崇樂三曰熙政四曰正刑五曰勸農六曰經
武故禮有紀若人之衣冠樂有章若人之喉舌政有統
若人之性情刑有制若人之呼吸農爲本若人之飲食
武爲用若人之手足斯六者不可斯須而去身也南征

還詔儼考正雅樂未幾拜翰林學士判太常寺儼校鍾磬筦簫之數辨清濁上下之節復舉律呂旋相爲宮之法迄宋猶遵用宋初就轉禮部侍郎代儀知貢舉當是時祀事樂章宗廟謚號多儼撰定卒年四十二儼性夷曠好賢樂善優游策府凡十餘年所撰周正樂成一百二十卷其通禮未及編纂而卒有文集七十卷儼於儀尤爲才俊對景覽古皆形諷詠更迭唱和至三百篇多以道義相敦厲儼尤善推步星曆盧多遜楊徽之同任諫官儼嘗謂之曰丁卯歲五星聚奎自此天下太平二拾遺見之儼不與也又曰儼昆弟皆登進士第然無及

相輔者唯偁稍近之亦不久居其位卒如其言

偁字曰章漢乾祐二年進士周爲絳州防禦判官宋歷
右補闕知宋州嘗作遂命賦以自悼太宗尹京選偁判
官時賈琰爲推官偁不樂其爲人太宗嘗宴諸王偁琰
與會琰言矯誕偁叱之曰巧言令色心不獨慄乎上愕
然因罷會出偁爲彰義軍節度判官後累遷參知政事
上謂偁曰汝何能臻此偁曰陛下不忘舊臣上曰非也
卿能以公正責賈琰朕旌直臣爾未幾卒年五十八贈
工部尚書

呂餘慶幽州人本名胤犯太祖偏諱因以字行父琦晉

兵部侍郎餘慶以蔭至忠武軍節度推官歷漢周爲定
國軍掌書記太祖初更三鎮餘慶並爲賓佐及卽位自
宋毫觀察判官召拜給事中充端明殿學士清泰中琦
亦居是職時人榮之累遷兵部侍郎知江陵府召還參
知政事蜀平命知成都府就加吏部侍郎歸朝兼劍南
荆南等道都提舉三司水陸發運等使開寶六年與宰
相更知政事卽旋以疾上表求解機務拜尚書左丞卒
年五十贈鎮南節度餘慶重厚簡易太祖受禪趙普李
處耘皆先進用餘慶恬不爲意未幾處耘黜守淄州太
祖委曲問處耘事餘慶以理辨釋趙普忤旨左右爭傾

晉餘慶獨辨明之時稱其長者弟端有傳

劉熙古字義淳寧陵人避祖寶進諱不舉進士後唐長興中以三傳舉時翰林學士和凝掌貢舉熙古獻春秋極論二篇演論三篇凝甚嘉賞召與進士試擢第歷仕晉漢周至宋州節度判官太祖適領是鎮及卽位召爲左諫議大夫知青州遷刑部侍郎知鳳翔府未幾移秦州歷端明殿學士開寶中參知政事歲餘以疾求解拜戶部尚書致仕卒年七十四贈右僕射熙古兼通陰陽象緯之術作續聿斯歌一卷六壬釋卦序例一卷性淳謹雖顯貴不改寒素歷官十八登朝三十餘年未嘗有

過嘗集古今事迹爲歷代紀要十五卷頗精小學作切韻拾玉二篇摹刻以獻學蒙正蒙叟

蒙正字頤正善騎射以蔭歷供奉官又掌朝服法物庫會重製繡衣鹵簿多其規式太平興國四年轉內藏庫副使進崇義使自創是庫卽被詔典領凡二十餘年真宗初改如京使出知滄冀磁三州戎人犯境固守有勞以擅乘驛馬責授亳州團練副使卒

蒙叟字道民乾德中進士甲科歷官中外最後知廬濠滁汝四州遷至都官郎中咸平中上䟽謂陛下已周諒諳方勤萬務無自矜能無作奢縱思鮮克之言戒性習

之漸上嘉之命直史館車駕北巡令知中宮名表獻宋
都賦述國家受命建號之地宜建都立宗廟時雖未遑
後卒從之會詔史館各獻舊文以蒙叟所著爲優改職
方郎中後拜太常少卿致仕卒子宗弼宗誨竝進士及
第

石熙載字凝績洛陽人顯德中進士登第宋初太宗領
泰寧軍節制辟爲掌書記及尹京表爲推官授右拾遺
遷左補闕以讒出爲忠武崇義二軍掌書記太宗卽位
復以左補闕召累擢戶部尚書知樞密院事寢疾求解
職授尚書右僕射卒年五十七謚元懿上爲悲嘆累日

熙載性忠實遇事盡言是非好惡無所顧避人有善卽
推薦之時稱其長者事繼母牛氏以孝聞牛前夫子依
石氏名熙導以熙載故補殿直從弟熙古幼弟熙正皆
登進士第熙載撫之如一卒時子中字中立皆幼熙正
熙導交訟上令有司再鞫得實熙導還本姓中孚亦養
子勿問熙正坐除名咸平二年熙載配饗太宗廟庭
中立字表臣年十三而孤性疎曠家財悉推與諸父無
所受累擢直集賢院善校讐祕書凡更中立者人皆傳
之歷尚書禮部侍郎爲學士承旨兼龍圖閣學士景祐
四年拜參知政事明年災異數見諫官韓琦言中立喜

談笑非大臣體以太子少傅致仕遷少師卒贈太子太傅謚文定中立練習臺閣故事不及汲近名喜賓客客至必與飲酒醉乃已初家產歲入百萬錢末年費幾盡帝聞其病賜白金三百兩既死其家至不能辦喪云

李穆字孟雍陽武人幼能屬文有至行行路得遺物必訪主歸之從王昭素受易及莊老書盡究其義周顯德初第進士遷右拾遺宋初以殿中侍御史選爲洋州通判移陝州有司調郡租穆以本鎮軍食闕不卽應坐免又坐舉官削前資開寶五年以太子中允召明年拜左拾遺知制誥穆與盧多遜爲同門生太祖嘗謂多遜李

穆性仁善辭學之外無所豫對曰穆操行端直臨事不以生死易節仁而有勇者也太平興國中累遷中書舍人以與多遜款狎又爲秦王廷美草朝辭笏記爲言者所劾責授司封員外郎八年復中書舍人數月爲翰林學上逾月知開封府猾姦無所貸權近無敢干以私擢左諫議大夫參知政事母憂起服穆三上表乞終制詔彊起之穆益哀毀盡禮明年正月晨起將朝暴卒自復官至此不及周歲上哭謂近臣曰非斯人之不幸乃朕之不幸也贈工部尚書年五十七穆性至孝居喪思慕以至滅性善篆隸文工畫常晦其事質厚忠恪無有矯

飾深信釋典並談名理接引後進多所薦達所著文章
多不留橐子惟簡以父任將作監丞多材藝性沖澹不
樂仕進家居二十餘年人多稱之真宗素聞其履行詔
官惟簡子郊後召惟簡入對特拜太子中允致仕又加
太常丞

肅字季雍穆弟也十歲爲詩往往有警語進士甲科歷
遷保靜軍節度推官性嗜酒遷詔方下一夕與親友會
飲酣寢而卒嘗作大宋樂章九首取九成九夏之義以
頌國家盛德其文甚工又作代周顥答北山移文弔幽
憂子文病雞賦意皆有所規焉

論曰歐陽脩五代史紀張憲泣拒張昭之請不及昭所
謂死而不朽者宋史豈爲昭諱而增飾耶倘導人以非
義苟生亦奚取夫博洽譔述哉寶氏兄弟五人克紹先
業儀儼備尤以文章操履擅名顧皆不獲大用惟備至
參政世謂范質趙普沮儀然儼嘗預測之寧非命乎呂
餘慶處僚友不競不嫉且爲辨誣劉熙古慎於其職履
富貴不充詘石熙載李穆並有至行多薦達祖宗朝治
體士風淳厚非諸賢力歟

宋史新編卷七十二

宋史新編卷七十三

列傳十五

明南京戶部主事莆田柯維騏著

薛居正

子惟吉

沈倫

子繼宗

盧多遜

宋琪

宋雄

薛居正字子平浚儀人登進士第歷仕晉漢周至刑部侍郎宋初遷戶部侍郎建隆三年爲樞密直學士權知貢舉初平湖湘以居正知朗州會亡卒聚山澤爲盜監軍使疑城中僧千餘人皆其黨議欲盡捕誅之居正以計緩其事因率衆翦滅群寇擒賊帥汪端詰之僧皆不預賴以全活乾德初加兵部侍郎車駕將親征太原大

發民餽運時河南府饑逃亡者四萬家上憂之命居正
馳傳招集浹旬間民盡復業以本官參知政事五年加
吏部侍郎開寶六年拜門下侍郎平章事太宗加左僕
射昭文館大學士又進司空因服丹砂遇毒方奏事覺
疾作遽出至殿門外飲水升餘堂吏掖歸中書已不能
言但指廡間儲水器左右取水至不能飲偃閣中吐氣
如火焰輿歸私第卒年七十贈太尉中書令謚文惠居
正氣貌瓌偉性孝行純居家儉約爲相寬簡不好苛察
自參政至爲相凡十八年恩遇始終不替太祖嘗謂居
正曰自古爲君者鮮克正已爲臣者多無遠略雖居顯

位不能垂名後代而身陷不義子孫罹殃蓋君臣之道
有所未盡吾觀唐太宗受人諫疏直詆其非而不恥以
朕所見不若自不爲之使人無異詞又論人臣不能有
終語在帝紀居正旣卒同時沈倫盧多遜二相皆獲譴
論者以居正守道蒙福果符太祖之言居正好讀書爲
文落筆不能自休子惟吉集爲三十卷上之賜名文惠
集真宗詔配饗太祖廟庭

惟吉字世康居正假子也居正妻妬悍無子故養惟吉
愛之篤與京師少年追逐角抵蹴鞠縱酒不謹又好音
樂與伶人游居正不能知蔭補西頭供奉太宗卽位三

相子皆超擢惟吉以不習文故爲右千牛衛大將軍及
居正卒太宗親臨存撫其妻因問不肖子安在頗改行
否恐不能負荷奈何惟吉懼赧自是盡革故態時論翕
然稱之上知其改行令知澶州歷遷左領軍衛大將軍
後移知延州未行卒惟吉旣改過能折節下士輕財好
施所至有能聲然御家無法及其死家人爭財致訟妻
子辨對於公庭事在張齊賢傳

沈倫字順儀太康人舊名義倫避太宗諱止名倫少習
三禮於嵩洛間講學自給周顯德初宣徽使胥居潤與
倫厚善薦於太祖留幕府太祖繼領三鎮皆署從事掌

留後財貨以廉聞及受禪自宋州觀察推官召爲戶部
郎中使吳越歸奏便宜十數事皆從之道出揚泗屬歲
飢民多死郡長吏白軍儲貸民秋收新粟公私俱利倫
爲白於朝有沮之者曰存饑無徵孰任其咎太祖以問
倫曰國家以廩粟濟民自當召和氣致豐稔矣太祖卽
命發廩貸民王師伐蜀用爲隨軍水陸轉運使先是王
全斌崔彥進入成都競取玉帛子女倫獨居佛寺飯蔬
食東歸篋中圖書數卷而已太祖知之遂貶全斌等以
倫爲戶部侍郎樞密副使開寶二年丁母憂起復視事
六年拜中書侍郎平章事太宗加右僕射兼門下侍郎

監脩國史親征太原倫爲留守還加左僕射後加開府儀同三司未幾盧多遜事敗以倫與同列不能覺察詔切責降工部尚書倫再疏乞骸骨復授左僕射致仕卒年七十九贈侍中倫清介醇謹好釋氏信因果嘗盛夏坐室中恣蚊蚋嚙其膚童子秉箠至輒叱之冀以徼福歲饑假粟千斛盡焚其券微時娶閭氏無子妾田氏生繼宗及貴閭以封邑固讓田倫乃爲閭治第太康田遂爲正宰縉紳非之初有司議謚倫曰恭惠繼宗上言亡父始事儒業遽赴賓招雖起家不由文學卽當歷集賢脩史之職伏請改謚曰文判太常禮儀院趙昂判考功

張洎駁曰沈倫備位合衡出於際會徒能謹飭以自保
全以恭配惠厥美居多昔張說謚文正楊綰謚文簡人
不謂然蓋行義有所未充雖蒙特賜誠非至公若夫大
臣子孫許其爲父陳請則曲臺考功之司爲虛器而彰
善癉惡之義微矣伏望如故從之

繼宗字世卿以蔭歷淮南轉運使繼宗貴家子倦於從
吏旣因疾以將作少監致仕東封求扈從復起歷光祿
少卿判三司三勾院繼宗不飲酒不嗜音律而喜接賓
客終日宴集無倦

盧多遜河內人父億以孝悌聞舉明經調補新鄉簿秩

滿復試進士校書郎集賢校理歷事晉漢周累官主客
度支郎中竝兼弘文館直學士後爲河南令宋初遷少
尹億性恬退聞其子多遜知制誥卽上章求解乾德二
年以少府監致仕多遜顯德初舉進士開寶四年爲翰
林學士六年使江南還因言江南衰弱可圖狀受詔同
修五代史遷中書舍人參知政事丁外艱數日起復太
平興國初拜中書侍郎平章事四年從平太原還加兵
部尚書多遜博涉經史聰明強力文辭敏給好任數有
謀略發多奇中初太祖好讀書每取書史館多遜預戒
吏令白已知所取書必通夕閱覽及太祖問書中事多

遜應若無滑石列皆伏焉知制誥張瑄趙普不協及在翰林多攻普短未幾普出鎮河陽太宗踐阼普入爲少保數年普子承宗娶燕國長公主女承宗適知澤州受詔歸闕成婚未踰月多遜白遣歸任普由是憤怒初普出鎮河陽上言自愬云外人謂臣輕議皇弟開封尹皇弟忠孝全德豈有間然矧昭憲皇太后大漸臣實預聞顧命知臣者君願賜昭鑒太祖手封其書藏宮中至是普復密奏爲權幸所沮因言昭憲顧命及先朝自愬之事上感悟語在廷美傳卽留承宗京師未幾復用普爲相多遜益不自安會有以多遜交通秦王事聞太宗怒

責授守兵部尚書明日以多遜屬吏獄具召文武常叅
官集議朝堂遂下詔削多遜官爵及追毀三代妻子贈
封并家屬配流崖州碁周已上親屬竝配隸邊遠州郡
事具廷美傳多遜累世墓在河南未敗前一夕震電盡
焚其林木聞者異之後卒于流所年五十二詔徙其家
容州未幾復移置荆南端拱初錄其子雍還其懷州籍
沒先塋雍卒錄其諸弟直宗詔有司給葬費仍錄其孫
初億性儉素自奉甚薄及多遜貴顯賜賚優厚服用漸
侈愀然不樂謂親友曰家世儒素一旦富貴暴至吾未
知稅駕之所人服其識

宋琪字似寶幽州薊人少好學晉祖割燕地奉契丹契丹歲開貢部琪舉進士中第署壽安王侍讀時天福六年也幽帥趙延壽及子贊皆署琪爲記室贊仕宋連移壽陽延安二鎮皆表爲從事乾德中太祖召拜左補闕開封府推官太宗爲尹初甚禮遇琪與宰相趙普樞密使李崇矩善出入門下遂惡之乃白太祖出琪知龍州移閬州又爲護國軍節度判官太宗卽位召赴闕時程羽賈琰皆自府邸攀附致顯要頗抑琪數年方授太子洗馬召見話責琪拜謝請悔過自新遷太常丞出知大通監旣而召歸將擢用爲盧多遜所沮改都官郎中出

知廣州將行復以藩邸舊僚留判三司勾院坐與王仁
瞻廷辨忤旨責授兵部員外郎俄通判開封府事京府
置通判自琪始趙普出鎮河陽琪遂與李昉同拜平章
自員外郎歲中四遷至尚書爲相太平興國八年也上
謂曰世之治亂在賞當其功罰當其罪卽無不治謂爲
飾喜怒之具卽無不亂卿等慎之明年上幸景龍門外
觀水碓因謂侍臣曰此水出於山源清泠甘美凡近河
水味皆甘豈非餘潤所及乎琪等對曰實因地脉潛通
而然亦猶人之善惡以染習而成也郊祀禮畢加門下
侍郎昭文館大學士一日上謂琪等曰在昔帝王多以

崇高自處顏色嚴毅左右無敢貢言者朕與卿等周旋款曲商確時事蓋欲通上下之情無有壅蔽卿等但直道而行無得有所顧避會宣徽使柴禹錫爲琪請廬多遜舊第上不悅語在禹錫傳中先是簡州軍事推官王澣引對上嘉其雋爽可與東宮官琪執不從擬大理丞告牒進入上批曰可右贊善大夫琪勉從命上滋不悅初上令琪娶馬仁瑀寡妻高繼冲之女厚加賜與以助采廣南轉運王延範高氏親也知廣州徐休復密奏不軌且言依附大臣上因琪與禹錫入對問延範何如入琪未知其端盛言延範強明忠幹禹錫旁奏與琪同上

意琪交通不欲暴其狀因以其素好詼諧無大臣體罷
守本官禹錫授左驍衛大將軍端拱初親耕籍田進吏
部尚書二年將討幽薊詔羣臣言邊事琪疏上謂靈旗
所指燕城必降但徑路所趨不無險隘必若取雄霸路
直進未免更有陽城之圍且述蕃部兵馬山川形勢甚
悉琪本燕人故究知其事俄又奏十策頗采用之淳化
二年詔百官轉對琪首應詔建明堂辟雍之議五年命
李繼隆討李繼遷王繼恩討李順琪又上書言邊事上
密寫其奏令繼隆擇利而行至道二年春拜右僕射優
給月俸是秋被病令其子貽序秉筆授辭作多幸老民

敘大抵謂洪範五福人所難全乃兼有之實天幸也又口占遺表數百字卒年八十贈司空諡惠安琪素有文學頗諳捷在使府前後三十年周知人情尤通吏術在相位日百執事有求請多面折之以是取怨於人

宋雄者亦幽州人初與琪齊名燕薊間謂二宋雄仕契丹爲應州從事雍熙三年王師北伐雄與節度副使艾正以城降授雄鴻臚少卿同知州事歷太子詹事光祿少卿遷將作監所至職務脩舉公私倚任焉雄涉獵文史善談論有氣節士流多推許之

論曰自古君國者曷嘗不倚輔弼之助矧創業初乎藝

祖乾德中設參知政事以薛居正分領而沈倫爲副樞
禾幾竝繼趙普爲相歷事兩朝雖無赫赫功然醇謹仁
恕裨益治體匪細宋琪久不爲太宗所知晚乃柄用觀
其惜名器不阿天子取容悅又安恤百執事之怨懟乎
盧多遜任數喜傾竟陷大戮孰與三子之守道保譽命
哉若宋雄與琪名齊而位不相逮遇與不遇耳琪之自
敘多幸殆有感也夫

李昉

子宗諤宗諤
孫昭遠等

呂蒙正

張齊賢

子宗諤

賈黃中

李昉字明遠饒陽人父超晉集賢殿直學士從大父右

贊善大夫洛無子以昉爲後蔭補齋郎選授太子校書
漢乾祐第進士歷右拾遺集賢殿修撰周歷翰林學士
宋初歷中書舍人直學士院昉知貢舉其鄉人武濟川
預選旣而奏對矢次昉坐左遷後復拜中書舍人翰林
學士判吏部銓盧多遜數言趙普之短太祖以訪昉對
曰臣職司書詔普之所爲非臣所知太宗卽位遷至工
部尚書兼承旨又改文明殿學士遂參知政事趙普出
鎮昉與宋琪俱拜平章事未幾加監脩國史復特政記
先進御而後付有司自昉議始也雍熙元年加中書侍
郎王師討幽薊不利遣使分詣河南東籍民爲兵凡八

丁取一昉等相率奏曰河南之民素習農桑罔知戰鬪
若因而嘯聚更須剪除如此則河北閭閻旣困於戎馬
河南生聚復擾於萑蒲上嘉納之端拱初有布衣馬周
擊登聞鼓訟昉爲宰相當北方有事不爲邊備徒知賦
詩宴樂乃罷昉爲右僕射會邊警益急詔羣臣進策備
禦昉又引漢唐故事深以屈已脩好弭兵息民爲言時
論稱之淳化二年復以本官兼中書侍郎平章事監脩
國史四年罷爲右僕射明年昉年七十以特進司空致
事朝會宴饗令綴宰相班至道元年上元觀燈乾元樓
召昉賜坐於側酌御罇酒飲之自取果餌以賜顧侍臣

曰李昉事朕兩入中書未嘗有傷人害物事宜其今日
所享如此可謂善人君子矣二年卒年七十二贈司徒
謚文正昉和厚多恕不念舊惡在位小心循謹無赫赫
稱爲文章慕白居易尤淺近易曉好接賓客江南平上
大夫歸朝者多從之遊雅厚張洎而薄張昖及昉罷相
洎草制深攻詆之而昖朔望必詣昉或詰昖曰李公待
君素不厚昖曰我爲廷尉日李公方秉政未嘗一有請
求此吾所以重之也昉所居有園亭別墅之勝旣致政
欲尋洛中九老故事議將集會蜀寇而罷昉素與盧多
遜善待之不疑多遜屢諧昉於上及入相太宗言及多

遜事昉頗爲解釋帝曰多遜居常毀卿一錢不直上由
此益重昉居中書日有求進用者雖知其材可取必正
色拒絕之已而擢用或不足用必和顏溫語待之子弟
問其故曰用賢人主之事若受其請是市私恩也故峻
絕之使恩歸於上若不用者旣失所望又無善辭取怨
之道也昉再相因表贈所生父母官詔從之有文集五
十卷子宗訥宗諤最顯

宗訥字大辨以蔭歷太常博士頗習典禮呂端引同判
禮院累遷比部郎中卒子昭迴真宗時獻文召試賜進
士第

宗諤字昌武七歲能屬文恥以父任得官由鄉舉第進士授校書郎獻文自薦遷祕書郎集賢校理同修起居

注真宗卽位拜起居舍人從征契丹上疏曰今之言事者不過請益兵貯糧分道掩殺言之甚易行之則難臣以爲臨軍易帥拔卒爲將在此時也有功者拔於朝不用者戮於市亦此時也遷知制誥判集賢院景德二年召爲翰林學士是秋將郊命判太常大樂鼓吹二署宗諤素曉音律因修完器具更署職名條上利病二十事又著樂纂以獻大中祥符初從封泰山改工部郎中三年祀汾陰后土爲經度制置副使同權河中府事禮成

優拜右諫議大夫宗諤究心典禮凡創制損益靡不與
聞五年卒年四十九帝甚悼之謂宰相曰國朝將相之
後能以聲名自立不墜門閥唯昉與曹彬家爾昉掌任
三館兩制宗諤不數年踐父職風流儒雅藏書萬卷內
行淳至事繼母以孝聞二兄早世奉嫂字孤恩禮兼盡
與弟宗諒友愛尤篤恩蔭必先群從及歿其子有未仕
者獎拔後進唯恐不及上人皆歸仰之工隸書有文集
六十卷內外制三十卷次子昭述

昭述字仲祖以蔭爲祕書省校書郎召試學士院賜進
士出身爲刑部詳覆官累遷河北轉運使徙湖南潭州

戍卒憤監軍酷暴欲構亂或曰如李公長者何可負事
遂寢昭述聞之以戒監軍自是不復爲暴比去衆遮道
羅拜歷真定府路安撫使知成德軍大水民多流亡籍
僧舍積粟爲粥糜活飢民數萬計改龍圖閣學士知秦
州言者謂庸懦不堪重鎮留真定府累遷尚書右丞卒
贈禮部尚書盜曰恪李氏居京城北崇慶里七世不異
爨至昭述稍自豐殖爲族人所望然家法亦不墮

昭遘字逢吉宗諤從子也以蔭登仕幼時楊億掌命爲
賦旣成嘆曰桂林之下無雜木非虛言也其後薦之召
試授館閣校勘歷鹽鐵判官初議罷天下職田及公使

錢昭邁以爲不可三司使姚仲孫惡其異已遂罷判官
爲白波發運使因入奏事仁宗謂曰前所論罷職田等
事卿言是也遷直史館知陝州諫官歐陽脩言昭邁無
治劇材改判三司理欠司徒度支判官後復直史館知
陝州累遷天章閣待制知滄州用諫官吳及言復改知
陝州徙鄭州卒昭邁性和易不忤物能守家法

呂蒙正字聖功河南人祖夢奇戶部侍郎父龜圖起居
郎蒙正太平興國二年擢進士第一授將作監丞通判
昇州累擢左補闕知制誥初龜圖多內寵與妻劉氏不
睦并蒙正出之頗淪躋窘乏劉氏不復嫁及蒙正登仕

迎二親奉養備至龜圖旋卒詔起復未幾遷都官郎中
入爲翰林學士擢左諫議大夫參知政事上謂之曰凡
士未達見當世之務戾于理者則怏怏于心及列於位
得以獻可替否當盡其所蘊雖言未必盡中亦當參議
而更之俾協于道朕固不以崇高自恃使人不敢言也
蒙正初入朝堂有朝士指之曰此子亦參政耶蒙正陽
爲不聞同列不能平詰其姓名蒙正遽止之曰若一知
其姓名則終身不能忘不若毋知之爲愈也李昉罷相
蒙正拜中書侍郎兼戶部尚書平章事監脩國史蒙正
質厚寬簡遇事敢言上嘉其無隱丁內艱又起復先是

盧多遜爲相子雍起家授水部員外郎後遂以爲常至是蒙正奏曰臣忝甲科及第釋褐止授九品京官况天下才能老於巖穴不霑寸祿者多矣今臣男始離襁褓膺此寵命恐罹陰譴乞以臣釋褐時官補之自是爲定制朝士有藏古鏡者自言能照三百里欲獻以求知蒙正笑曰吾面不過楮子大安用照二百里哉淳化中罷爲吏部尚書復相李昉及昉罷蒙正復以本官入相因對論及征伐曰治國之要在內脩政事則遠人來歸上諱之嘗燈夕設宴蒙正侍上語之曰五代之際生靈凋喪當時謂無復太平之日矣朕躬覽庶政萬事粗理每

卷上天之貺致此繁盛乃知理亂在人蒙正避席曰乘
輿所在士庶走集故繁盛如此臣嘗見都城外不數里
饑寒而死者甚衆不必盡然願陛下視近以及遠蒼生
之幸也上變色不言蒙正侃然復位上嘗欲遣人使朔
方諭中書選才可責以事者蒙正退以名上上不許他
日三問三以其人對上曰卿何執耶蒙正曰臣不欲用
媚道妄隨人主意以害國事同列悚息不敢動上退謂
左右曰蒙正氣量我不如旣而卒用所薦果稱職至道
初以右僕射出判河南府兼西京留守真宗卽位進左
僕射會營奉熙陵蒙正追感先朝不次之遇奉家財三

百餘萬以助用咸平四年以本官同平章事昭文館大學士國朝以來三入相者惟趙普與蒙正焉郊祀禮成加司空兼門下侍郎六年授太子太師封萊國公改封隨又封許景德二年表請歸洛陞辭因言遠人請和弭兵省財古今上策上嘉納之大中祥符而後上朝永熙陵封泰山祠后上過洛兩幸其第錫賚有加上謂蒙正曰卿諸子孰可用對曰諸子皆不足用有姪夷簡任潁州推官宰相才也夷簡由是見知於上許國命甫下卒年六十八贈中書令謚文穆蒙正初相時張紳知蔡州坐賊免或言於上曰紳家富不至此特蒙正貧時勾索

不如意今報之爾上命卽復紳官蒙正不辨後考課院
得紳實狀復黜紳蒙正再入相太宗謂曰張紳果有賊
蒙正不辨亦不謝子七人皆爲京朝官六子居簡最顯
慶曆中提點京東州獄時夏竦有憾石介介死言於上
曰介未嘗死北走鄰國矣乃遣中使發棺居簡不可語
在介傳中使乃令保證以聞介事乃白人稱爲長者終
兵部侍郎判西京御史臺

張齊賢曹州人晉亂徙家洛陽孤貧力學有遠志慕唐
李太亮之爲人故字師亮太祖幸西都齊賢以布衣獻
策馬前召至行宮以手畫地條陳十事曰下并汾曰富

民曰封建曰敦孝曰舉賢曰太學曰籍田曰選良吏曰
慎刑曰懲姦內四說稱旨齊賢堅執以爲皆善上怒令
武士拽出之及還語太宗曰我幸西都唯得一張齊賢
爾我不欲爵之以官異時可使輔汝爲相也太宗擢進
士欲置齊賢高第有司偶失掄選上不悅一榜盡與京
官於是齊賢以大理評事通判衡州代還歷左拾遺車
駕北征議者皆言宜速取幽薊齊賢上疏曰聖人舉事
動在萬全百戰百勝不若不戰而勝自古疆場之難非
盡由敵國亦多邊吏擾而致之若蓄力養銳以逸自處
寧我致人此李牧所以用趙也臣聞家六合者以天下

爲心豈止爭尺寸之事角強弱之勢而已乎是故聖人
先本而後末安內以養外人民本也疆土末也堯舜之
道無他在乎安民而利之爾民旣安利則遠人斂衽而
至矣出爲江南西路轉運副使俄改右補闕加正使齊
賢至官詢知饒信虔州土產銅鐵鉛錫之所推求前代
鑄法歲鑄五十萬貫詣闕面陳其事敷奏詳確議者不
能奪先是諸州罪人多錮送闕下路死者十常五六齊
賢道逢所送索牒視之率非首犯悉伸其冤因力言于
朝後凡送囚至京請委強明吏慮問不實則罪及原問
官屬自是送罪人者爲減大半前代弊政齊賢悉論免

之居使職勤究民弊務行寬大江左人思之不忘召還
拜樞密直學士擢簽書樞密院事雍熙初遷左諫議大
夫三年大舉北伐楊業戰沒上訪近臣以策齊賢請行
卽授給事中知代州與部署潘美同領緣邊兵馬是時
契丹兵自湖谷入寇薄城下神衛都校馬正以所部列
南門外衆寡不敵副部署盧漢賁畏懦保壁自固齊賢
選宿軍二千出正之右誓衆慷慨以當百契丹兵遂
却先是約潘美以奔師來會戰無何間使爲契丹所得
旣而美使至云得密詔奔之全軍不許出戰已還州矣
齊賢曰賊知美之來而不知美之退乃閉其使密室中

夜發兵二百人持一幟負一束芻距州城西南三十里
列幟然芻敵兵遙見火光中有旗幟意謂并師至矣駭
而北走齊賢先伏步兵二千於土磴砦掩擊大敗之捷
奏且歸功漢賁端拱元年冬遷工部侍郎契丹又自大
石路南侵齊賢預簡廂兵千人爲二部分屯繁峙崞縣
下令曰代西有寇則崞縣之師應之代東有寇則繁峙
之師應之比接戰則郡兵集矣至是果爲繁峙兵所敗
二年拜刑部侍郎樞密副使淳化二年參知政事數月
拜吏部侍郎同中書門下平章事齊賢母孫氏年八十
餘封晉國太夫人每入謁禁中上歎其福壽有令子手

詔存問加賜與縉紳榮之初王延德與朱貽業同掌京
庾欲求補外貽業與參政李沆有姻婭託之以請於沆
沆爲請於齊賢齊賢以聞太宗以延德嘗事晉邸怒其
不自陳而干所執政召見詰責延德貽業皆諱不以實
對齊賢不欲累沆獨任其責四年罷爲尚書左丞丁內
艱終喪復轉禮部尚書知河南府徙知永興軍時閣門
祗候趙贊以言事得罪提點關中芻糧所爲多豪橫齊
賢論列其罪卒抵於法俄徙襄州移荆南又徙安州踰
年加刊部尚書真宗卽位召拜兵部尚書同中書門下
平章事嘗從容爲上言皇王之道而推本其所以然上

曰皇王之道非有跡但庶事適治道則近之矣郊祀加
門下侍郎與李沆同事不相得坐事免咸平四年李繼
遷陷清遠軍命爲涇原等州軍安撫經略使齊賢上言
謂靈武一郡援隔勢孤必難固守萬一失陷賊勢益增
師難必勝臣所以乞討潘羅支爲六谷王而厚以金帛
者恐繼遷旦暮用兵斷彼賣馬之路也若曰名器不可
假人爵賞不可濫及此乃聖人爲治常道非隨時變易
之義也後又言靈州斗絕一隅自繼遷爲患已來危困
彌甚若能增益精兵以合西邊屯駐對替之兵從以原
渭鎮戎之師率山西熟戶從東界而入嚴約師期兩路

交進兵鋒未交自可解靈州之圍矣時不能用未幾靈
武果陷十二月拜右僕射判汾州不行改判永興軍兼
馬步軍部署時薛居正子惟吉妻柴氏無子早寡盡蓄
其貨產及書籍論告欲改適齊賢惟吉子安上訴其事
上不欲寘于理命官就訊柴氏所對與安上狀異下其
事御史乃齊賢子太子中舍宗誨教柴氏爲詞齊賢坐
責太常卿分司西京宗誨貶海州別駕景德初起爲兵
部尚書知青州上辛澶淵命兼青淄濰州安撫使二年
改吏部尚書從東封還復拜右僕射時建王清昭應宮
齊賢言繪畫符瑞有損謙德又違奉天之意屢請罷其

役三年出判河陽從祀汾陰還進左僕射五年代還請
老以司空致仕歸洛得裴度午橋莊有池榭松竹之勝
日與親舊醵詠其間息甚曠適七年卒年七十二贈司
徒諡文定齊賢資儀豐碩議論慷慨以致君自負留心
刑獄多所全活喜提獎寒雋神放之起齊賢所薦也齊
賢四踐兩府九居八座以三公就第康寧福壽時罕其
比居相日數起大獄又與寇準相傾人或以此少之諸
子皆能有立宗禮最賢累資登朝而畏羈束故多居田
里云

宗誨字習之齊賢次子也少喜學兵法及陰陽象緯之

書以父任累遷興州防禦使復徙永興鈐轄兼知邠州
以祕書監致仕葺事干謁其子曰昔賀祕監以道士服
歸會稽明皇賜鑑湖爲休老之地今洛下雖無鑑湖而
嵩少伊瀍天下佳處雖非朝廷所賜皆閒逸之人所有
爾大人盍衣羽服以優游何必更事請謁乎宗誨曰吾
竹白頭老監祕書而眠何以賀老流沙之服爲哉時以
爲名言宗誨性貪貨殖終其身子二人子阜字叔謨少
有才名而不自負人樂與之游最善尹洙洙曰吾交天
下士多矣不以通否易意者子阜也第進士累官至尚
書司封員外郎子憲字彥章陰爲將作監主簿以獻文

賜同進士出身歷祕書監累職徙揚州卒

賈黃中字媯民南皮人父玘字仲寶晉天福三年進士
解褐宋終水部員外郎知汝儀縣年七十卒玘嚴毅善
教子黃中六歲舉童子科七歲能屬文賦詩十五舉進
士由集賢校理遷直史館建隆中遷左拾遺歷左補闕
開寶末通判定州判太常禮院損益得中號稱職嶺南
平以爲採訪使遠人便之還奏利害數十事皆稱旨選
知宣州太宗卽位遷禮部員外郎太平興國二年知昇
州時金陵初附爲政簡易部內甚治一日按行府署見
一室扃鑰甚固發視之得金寶數十積直數百萬乃李

氏遺物也卽表上之賜錢三十萬丁父憂起復視事五年召歸有薦黃中文學高第試中書拜駕部員外郎知制誥八年充翰林學士不數年遷至給事中參知政事帝召見其母王氏命坐謂曰教子如是真孟母矣作詩賜之頒賚甚厚黃中喜薦引當世文行士而未嘗言人莫之知也然畏慎過甚中書政事頗留不決甫二年罷守本官旣而知襄州上言母老乞留京改知澶州辭曰上戒之曰小心翼翼君臣皆當然若太過則失大臣體黃中頓首謝至道初特拜禮部侍郎黃中素嗜文籍旣居內閣甚慰未幾卒年五十六贈禮部尚書黃中端謹

能守家法廉白無私多知臺閣故事談論臺臺聽者忘倦在翰林日太宗召訪時政得失黃中言臣職典書詔思不出位軍國政事非臣所知上益重之以爲謹厚及知政事卒無所建明時論不之許有文集三十卷子守謙雍熙二年進士守正獻文召試賜進士

論曰太宗續大業而臻盛治匪獨謨略懿也蓋亦有良執政之助焉李昉循謹重厚似薛居正呂蒙正雅量忠實似石熙載張齊賢明敏果斷似趙普賈黃中持廉有容似李穆帝方勵精政事虛懷聽納數君子者將順德意協贊昇平想是當時賞花曲宴庶幾卷阿之風乎

宋史新編卷七十三